




Heineken® TONIGHT!!!

He-Pa San Nicolas

PARTY PEOPLE GET READY! 8:00 PM

Your
Carnival
Your
Heineken

Awe ta dia internacional di Idioma Materno

ORANJESTAD (AAN) -- Grupo 21 di Februari (GF-21) a proporciona DIARIO e siguiente relato, en conexcion cu

"Dia Internacional di Idioma Materno", cual ta worde celebra awe.

Na November 1999 UNESCO a proclama dia 21 di Februari como "Dia Internacional di Idioma Materno". Esey kiermen cu aña pasa pa prome biaha UNESCO y e paisnan miembro a celebra e dia special aki cu un ceremonia oficial na e Oficina Principal.

Director general di UNESCO, Koichiro Matsura, a habri e evento aki y el a pone enfasis riba lo siguiente:

"Cu e decision di celebra e idioma materno, e estadonan cu ta miembro di UNESCO kier pone atencion riba e hecho cu idioma no ta solamente un parti esencial di

herencia cultural di humanidad, pero tambe e expresion irreducible di creatividad humano y di su gran diversidad".

Tin mas of menos 6000 idioma den e mundo aki y segun e director general:

"Nan ta testigo di e habilidad increible di hende pa crea herment pa comunicacion, nan ta testigo di su percepcion y reflexion. Nan ta spiel di e alma di e sociedadnan den cual nan a nace y nan ta refleha historia di nan contactonan. Den e sentido aki por bisa cu tur idioma a nace y desaroya den contacto cu otro".

Pues awe, dia 21 di Februari, ta Dia Internacional di Idioma Materno, un dia cu aki na Aruba tambe nos mester celebra.

Aki na Aruba nos tin un situacion multilingual: esey kiermen cu tin hopi idioma

materno na Aruba. E idioma materno di mas grandi den cantidad di hablante ta naturalmente Papiamento, sigui pa Spaño, despues Ingles y na di cuater lugar nos ta haya Hulandes. Tin hopi mas idioma materno na Aruba, mayoria di nan papia pa grupo hopi chiquito.

Si nos wak e posicion di Papiamento den enseñanza, esaki no a haya reconocimiento cu e merece den e siglo cu nos tin tras di lomba. Den e siglo nobo aki, siglo 21, nos lo mira un cambio grandi: a dicidi caba cu Papiamento ta

bay drenta school. Actualmente tin hopi trabao ta tuma lugar pa por realiza esaki.

Ta bon pa bisa aki cu e otro idiomaan: Hulandes, Ingles y Spaño, tambe lo ta den enseñanza y cu e enseñanza nobo lo dedica atencion tambe na e muchanan den nos enseñanza cu no tin Papiamento como nan idioma materno.

Manera e director general di UNESCO a bisa:

"Promocion di diversidad linguistico y desaroyo di un educacion multilingual for di edad hoben, ta yuda preserva

diversidad di cultura y e condicionnan pa comprension, tolerancia y respet mutuo riba un base internacional".

Nos mester enfatiza y respeta e balor di idioma, como medio di comunicacion y como expresion di cultura y identidad. Idioma ta pa hende un di e tesoronan di mas precioso y fragil.

Dia Internacional di Idioma Materno ta haci nos conciente di e balor grandi aki di idioma. Nos mester yuda conserva nos idiomaan, como cu nan ta e herencia di humanidad di nos tur.